



正月半

正月半，分你想著恁多麼个事情？

正月半係上元節。照民間个俗，這日係三官大帝之首，上元一品賜福天官紫微大帝个生日，安到天官生，又安到上元節！服祀天地水三官大帝个宮廟，會有盛大个祝壽儀式。像苗栗南庄个永昌宮，在十四个半夜子時，就會行九獻禮。就在該時節，你會看著一群善信大德，身項著等廟項个行禮服，遵照傳統个古禮，在正通生、正讚生个喊禮之下，所有信士共下合作，完成了請神、獻禮、送神个儀式。一群七八十歲个老人家，誠心个儀式、虔誠个身影、恭敬个心，大家看著，就當感動！

正月半係元宵節。為著慶祝過年後个第一隻月圓之夜，在客家莊乜有當多个民俗活動。在這日，你做得看著名列客家十二大節慶个六堆尖炮城、東勢个新丁板節、苗栗市个撈龍活動，你做得感受著鬧熱个元宵氣氛，還有虔誠个敬神、祈福儀式。在這日，你乜做得看著，當多人去看花燈、揣令仔、細人仔擎燈籠、打紙炮仔、一屋下人共下食板圓个情景。在這日，還有各縣市輪流舉辦个臺灣燈會、全國各地迎花燈个活動。其中，新竹新埔迎花燈比賽係盡有歷史、乜係盡有特色个活動。像花車頂个燈籠景閣四圍，就貼有用客話創作个詩對文句，展現新埔个客家文化特色。

正月半，也係祈福个時節。在一年个開始，大家就希望身體健康、萬事如意、學業進步、事業順序，家庭幸福美滿、風調雨順、國泰民安……。臺灣个各各族群、宗教、民間信仰，在這時節就有厥个祈福儀式。春天來好祈福、秋收後好還福，起福還福、春祈秋報，一年過一年，表現出人類對天地神明个敬畏，還有醺醺个感恩之情。

正月半過，乜係掛紙个時節。臺灣客家人，一年一擺慎終追遠、團結家族、聯絡情感个掛紙風俗，就在該日過後開始。

正月半，正經，分恁恁著當多事情！

作者：邱一帆

☆詞彙學習☆

- | | |
|------------------------------------|-------------------------------|
| 【正月半】zang' ngied ban：農曆正月十五。 | 【一屋下人】id' vug' ka' ngin'：一家人。 |
| 【上元節】song ngien' jied'：賜福天官誕辰。 | 【起福】hi' fug'：祈求神明賜予幸福。 |
| 【新丁板】xin' den' ban'：新生小孩製作紅板酬神、贈友。 | 【還福】van' fug'：酬神還願。 |
| 【揣令仔】ton' liang e'：猜謎語、燈謎。 | 【恁著】men' do'：想到。 |

☆文法學習☆

- 【做得……乜做得……】可以……也可以……：「做得」、「乜做得」後接允許的行為、狀態、情况等。也可以將允許的行為、狀態、情况等，置於「做得」、「乜做得」之前。
- 例 1：你這下做得去看電視，乜做得去打球仔！（你現在可以看電視，也可以打球！）
- 例 2：你這下去看電視做得，去打球仔乜做得。（你現在看電視可以，打球也可以。）